

御錄經海一滴卷之十五

機五

大般涅槃經之三

爾時佛告迦葉菩薩善男子菩薩摩訶薩應於是大涅槃經專心思惟聖行梵行常當修習復有如來行所謂大乘大涅槃經迦葉云

機五

何菩薩摩訶薩所修聖行菩薩摩訶薩若從聲聞若從如來得聞如是大涅槃經聞已生信信已應作如是思惟諸佛世尊有無上道有大正法大眾正行復有方等大乘經典我今當爲愛樂貪求大乘經故捨離所愛妻子眷屬剃除鬚髮服三法衣旣出家已奉持禁戒威儀不缺進止安詳無所觸犯乃至小罪心生怖畏護戒之心猶如金剛善男子譬如有人帶持浮囊欲渡大海爾時海中有一羅刹卽從其人乞索浮囊其人聞已卽作是念

我今若與必定沒死答言羅刹汝寧殺我浮囊叵得羅刹復言汝若不能全與我者見惠其半是人猶故不肯與之羅刹復言汝若不能惠我半者幸願與我三分之一是人不肯羅刹復言若不能者當施手許是人不肯羅刹復言汝今若復不能與我如手許者我今飢窮衆苦所逼願當濟我如微塵許是人復言汝今所索誠復不多然我今日方當渡海不知前途近遠如何若與汝者氣當漸出大海之難何由得過善男子菩薩摩訶薩護持禁戒亦復如是如彼渡人護惜浮囊菩薩如是護戒之時常有煩惱諸惡羅刹語菩薩言汝當信我終不相欺但破禁戒令汝安隱得入涅槃菩薩爾時應作是言我今寧持如是禁戒隨阿鼻獄終不毀犯而生天上菩薩摩

訶薩於是諸戒律中護持堅固心如金剛受持如是諸禁戒已作是願言寧以此身投於熾然猛火深坑終不毀犯過去未來現在諸佛所制禁戒 復次善男子菩薩摩訶薩復作是願寧以熱鐵周巾纏身終不敢以破戒

戒五

二

之身受於信心檀越衣服復作是願寧以此口吞熱鐵丸終不敢以毀戒之口食於信心檀越飲食復作是願寧卧此身大熱鐵上終不敢以破戒之身受於信心檀越牀卧敷具復作是願我寧以身受三百鉞終不敢以毀戒之身受於信心檀越醫藥復作是願寧以此身投熱鐵鑊不以破戒之身受於信心檀越房舍屋宅復作是願寧以鐵鎚打碎此身從頭至足令如微塵不以破戒受諸剎利婆羅門居士恭敬禮拜復次善男子菩薩摩訶

薩復作是願寧以熱鐵挑其兩目不以染心視他好色復作是願寧以鐵錐徧耳撓刺不以染心聽好音聲復作是願寧以利刀割去其鼻不以染心貪嗅諸香復作是願寧以利刀割裂其舌不以染心貪著美味復作是願寧以利斧斬斫其身不以染心貪著諸觸何以故以是因緣能令行者墮於地獄畜生餓鬼是名菩薩護持禁戒菩薩摩訶薩護持如是諸禁戒已悉以施於一切衆生以是因緣願令衆生護持禁戒得清淨戒善戒不缺戒

戒五

三

不垢戒大乘戒不退戒隨順戒畢竟戒具足成就波羅密戒善男子菩薩摩訶薩修持如是清淨戒時即得住於初不動地云何名不動地菩薩住是不動地中不動不墮不退不散譬如須彌山旋嵐猛風不能令動墮落退

散菩薩摩訶薩住是地中亦復如是不爲色聲香味觸所動不墮地獄畜生餓鬼不退聲聞辟支佛地不爲異見邪風所散而作邪命善男子又不動者不爲貪欲恚癡所動又不墮者不墮四重又不退者不退戒還俗又不散者不爲違逆大乘經者之所散壞亦復不爲諸煩惱魔之所傾動不爲陰魔所墮乃至坐於道場菩提樹下雖有天魔不能令其退於阿耨多羅三藐三菩提亦復不爲死魔所散善男子是名菩薩摩訶薩修習聖行善男子云何名爲聖行聖行者佛及菩薩之所行故故名聖行以何等故名佛菩薩爲聖人也如是等人有聖法故常觀諸法性空寂故以是義故故名聖人有聖戒故復名聖人有聖定慧故故名聖人有七聖財所謂信戒慙愧

多聞智慧捨離故故名聖人有七聖覺故故名聖人以是義故復名聖行 復次迦葉又有聖行所謂四聖諦苦集滅道是名四聖諦迦葉苦者逼迫相集者能生長相滅者寂滅相道者大乘相復次善男子苦者現相集者轉相滅者除相道者能除相復次善男子苦者有三相苦苦相行苦相壞苦相集者二十五有滅者滅二十五有道者修戒定慧復次善男子有漏法者有二種有因有果無漏法者亦有二種有因有果有漏果者是則名苦

機五

有漏因者則名爲集無漏果者則名爲滅無漏因者則名爲道復次善男子八相名苦所謂生苦老苦病苦死苦愛別離苦怨憎會苦求不得苦五盛陰苦能生如是八苦法者是名爲集無有如是八法之處是名爲滅十力

四無所畏三念處大悲是名爲道 迦葉三
界受身無不有生老不必定是故一切生爲
根本迦葉世間衆生顛倒覆心貪著生相厭
患老死迦葉菩薩不爾觀其初生已見過患
迦葉如有女人相好莊嚴入一人舍主人問
曰汝是何人答曰我乃功德大天我所至處
能令其家財寶豐盈主人歡喜恭敬禮拜更
見門外一女衣貌陋垢主人問曰汝是何人
答曰我名黑闇我所行處能令其人財寶耗
散主人聞已持刀驅逐女人答言汝甚愚癡
無有智慧汝舍內者即是我姊我常與姊進
止共俱汝若驅我亦當逐彼主人入問功德
天言實是我妹我與此妹行住不離隨所住
處我常作好彼常作惡我爲利益彼爲衰損
若愛我者亦應愛彼若見恭敬亦應敬彼主

樓五

五

人即言若此好惡我俱不用各隨意去是時
二女相將還其所止迦葉菩薩摩訶薩亦復
如是不願生天以生當有老病死故是以俱
棄曾無愛心凡夫愚人不知老病死等過患
是故愛憎生死二法譬如毒樹根亦能殺莖
亦能殺皮華果實悉亦能殺善男子二十五
有受生之處所受五陰亦復如是一切能殺
迦葉菩薩白佛言世尊如佛所說五盛陰
苦是義不然何以故如佛往昔告釋摩男若
色苦者一切衆生不應求色若有求者則不
名苦如佛告諸比丘有三種受苦受樂受不
苦不樂受如佛先爲諸比丘說若有人能修
行善法則得受樂又如佛說於善道中六觸
受樂眼見好色是則爲樂耳鼻舌身意思好
法亦復如是世尊如諸經中所說樂相其義

如是如佛今說云何當與此義相應 佛告
迦葉善哉善哉善能諮問如來是義善男子
一切衆生於下苦中橫生樂想是故我今所
說苦相與本不異猶如有人當受千罰受一
下已即得脫若是人爾時便生樂想是故當
知於無樂中妄生樂想迦葉言世尊彼人不
以一下生於樂想以得脫故而生樂想迦葉
是故我昔爲釋摩男說五陰中樂實不虛也
迦葉有三受三苦三受者所謂樂受苦受不
苦不樂受三苦者所謂苦苦行苦壞苦善男
子苦受者名爲三苦所謂苦苦行苦壞苦餘
二受者所謂行苦壞苦善男子以是因緣生
死之中實有樂受苦薩摩訶薩以苦樂性不
相捨離是故說言一切皆苦善男子生死之
中實無有樂但諸佛菩薩隨順世間說言有

後五

六

樂世尊諸佛菩薩若隨俗說是虛妄不如佛
所說修行善者則受樂報持戒安樂身不受
苦乃至衆事以辦是爲最樂如是等經所說
樂受是虛妄不佛言善男子如上所說諸受
樂者即是菩提道之根本亦能長養阿耨多
羅三藐三菩提以是義故先於經中說是樂
相 善男子諸凡夫人有苦無諦聲聞緣覺
有苦有苦諦而無真實諸菩薩等解苦無苦
是故無苦而有真諦諸凡夫人有集無諦聲
聞緣覺有集有集諦諸菩薩等解集無集是
故無集而有真諦聲聞緣覺有滅非真菩薩
摩訶薩有滅有真諦聲聞緣覺有道非真菩
薩摩訶薩有道有真諦善男子云何菩薩摩
訶薩住於大乘大般涅槃見滅見滅諦所謂
斷除一切煩惱若煩惱斷則名爲常滅煩惱

火則名寂滅煩惱滅故則得受樂諸佛菩薩
求因緣故故名爲淨更不復受二十五有故
名出世以出世故名爲我常於色聲香味觸
男女生住滅苦樂不苦不樂不取相貌故名
畢竟寂滅真諦善男子是四聖諦諸佛世尊
次第說之以是因緣無量衆生得度生死

機五

七

爾時文殊師利菩薩白佛言世尊所說世諦
第一義諦其義云何世尊第一義中有世諦
不世諦之中有第一義不如其有者即是一
諦如其無者將非如來虛妄說耶佛言善男
子世諦者即第一義諦世尊若爾者則無二
諦善男子有善方便隨順衆生說有二諦善
男子若隨言說則有二種一者世法二者出
世法如出世人之所知者名第一義諦世人
知者名爲世諦善男子五陰和合稱言某甲

凡夫衆生隨其所稱是名世諦解陰無有某
甲名字離陰亦無某甲名字出世之人如其
性相而能知名第一義諦復次善男子或
復有法有名有實或復有法有名無實有名
無實者即是世諦有名有實者是第一義諦
復次善男子若燒若割若死若壞是名世
諦無燒無割無死無壞是名第一義諦復次
善男子有八苦相名爲世諦無生無老無病
無死無愛別離無怨憎會無求不得無五盛
陰是名第一義諦言實諦者名曰真法善男
子若法非真不名實諦實諦者無有顛倒無
顛倒者乃名實諦善男子實諦者無有虛妄
若有虛妄不名實諦實諦者名曰大乘非大
乘者不名實諦實諦者是佛所說非魔所說
善男子實諦者一道清淨無有二也善男子

有常有樂有我有淨是則名為實諦之義文殊師利白佛言世尊若以真實為實諦者真實之法即是如來虛空佛性若如是者如來虛空及與佛性無有差別佛告文殊師利有苦有諦有實有集有諦有實有滅有諦有實

機五

有道有諦有實善男子如來非苦非諦是實虛空非苦非諦是實佛性非苦非諦是實文殊師利所言苦者為無常相是可斷相是為實諦如來之性非苦非無常非可斷相是故為實虛空佛性亦復如是復次善男子所言集者能令五陰和合而生亦名為苦亦名無常是可斷相是為實諦善男子如來非是集性非是陰因非可斷相是故為實虛空佛性亦復如是善男子所言滅者名煩惱滅亦常無常二乘所得名曰無常諸佛所得是則名

常亦名證法是為實諦善男子如來之性不名為滅能滅煩惱非常無常不名證知常住無變是故為實虛空佛性亦復如是善男子道者能斷煩惱亦常無常是可修法是名實諦如來非道能斷煩惱非常無常非可修法

機五

九

常住不變是故為實虛空佛性亦復如是復次善男子言真實者即是如來如來者即是真實真實者即是虛空虛空者即是真實真實者即是佛性佛性者即是真實文殊師利有苦有苦因有苦盡有苦對如來非苦乃至非對是故為實不名為諦虛空佛性亦復如是苦者有為有漏無樂如來非有為非有漏湛然安樂是實非諦文殊師利言若佛所說名為實諦當知魔說則為不實世尊如魔所說聖諦攝不佛言文殊師利魔所說者二

諦所攝所謂苦集凡是一切非法非律不能
令人而得利益終日宣說亦無有人見苦斷
集證滅修道是名虛妄如是虛妄名爲魔說
文殊師利言如佛所說一道清淨無有二者
諸外道等亦復說言我有一道清淨無二若
言一道是實諦者與彼外道有何差別若無
差別不應說言一道清淨佛言善男子諸外
道等有苦集諦無滅道諦於非滅中而生滅
想於非道中而生道想於非果中生於果想
於非因中生於因想以是義故彼無一道清
淨無二文殊師利言世尊諸外道等種種說
有常樂我淨當知定有常樂我淨世尊以是
義故諸外道等亦得說言我有真諦佛言善
男子若有沙門婆羅門有常有樂有我有淨
者是非沙門非婆羅門何以故迷於生死離

一切智大導師故如是沙門婆羅門等沈沒
諸欲善法羸損故是諸外道繫在貪欲瞋恚
癡獄堪忍受樂故是諸外道雖知業果自作
自受而猶不能遠離惡法是諸外道非是正
法正命自活何以故無智慧火不能消故是
諸外道迷惑顛倒言諸行常諸行若常無有
是處善男子我觀諸行悉皆無常云何知也
以因緣故若有諸法從緣生者則知無常是
諸外道無有一法不從緣生善男子佛性無
生無滅無去無來非過去非未來非現在非
橫五
因所作非無因作非作非作者非相非無相
非有名非無名非名非色非長非短非陰界
八之所攝持是故名常善男子佛性即是如
來如來即是法法即是常善男子常者即是
如來如來即是僧僧即是常以是義故從因

生法不名爲常是諸外道無有一法不從因
生是諸外道不見佛性如來及法是故外道
所可言說悉是妄語無有真諦善男子一切
有爲皆是無常虛空無爲是故爲常佛性無
爲是故爲常虛空者即是佛性佛性者即是
如來如來者即是無爲無爲者即是常常者
即是法法者即是僧僧即無爲無爲者即是
常善男子有爲之法凡有二種色法非色法
非色法者心心數法色法者地水火風善男
子心名無常何以故性是攀緣相應分別故
眼識性異乃至意識性異是故無常色境界
異乃至法境界異是故無常眼識相應異乃
至意識相應異是故無常善男子心若常者
眼識應獨緣一切法若眼識異乃至意識異
則知無常以法相似念念生滅凡夫見已計

之爲常善男子諸因緣相可破壞故亦名無
常所謂因眼因色因明因思惟生於眼識耳
識生時所因各異非眼識因緣乃至意識異
亦復如是 復次善男子壞諸行因緣異故
心名無常所謂修無常心異修苦空無我心
異心若常者應常修無常尚不得觀苦空無
我況復得觀常樂我淨以是義故外道法中
不能攝取常樂我淨善男子當知心法必定
無常復次善男子心性異故名爲無常所謂
聲聞心性異緣覺心性異諸佛心性異一切
外道心有三種一者出家心二者在家心三
者在家遠離心樂相應心異苦相應心異不
苦不樂相應心異貪欲相應心異瞋恚相應
心異愚癡相應心異一切外道心相亦異所
謂疑惑相應心異邪見相應心異進止威儀

其心亦異善男子心若常者亦復不能分別諸色所謂青黃赤白紫色心若常者諸憶念法不應忘失心若常者凡所讀誦不應增長復次善男子心若常者不應說言已作今作當作若有已作今作當作當知是心必定無常心若常者則無怨親非怨非親心若常者則不應言我物他物若死若生心若常者雖有所作不應增長以是義故當知心性各各別異有別異故當知無常善男子我今於此非色法中演說無常其義已顯復當爲汝說色無常是色無常本無有生生已滅故內心處胎歌羅邏時本無有生生已變故外諸芽莖本無有生生已變故是故當知一切色法悉皆無常善男子所有內色隨時而變歌羅邏時異初生時異嬰孩時異童子時異乃至

後五

十二

老時各各變異所有外色亦復如是芽異莖異枝異葉異華異果異復次善男子歌羅邏時狀貌異乃至老時狀貌亦異歌羅邏時果報異乃至老時果報亦異歌羅邏時名字異乃至老時名字亦異故知無常凡夫無知見相似生計以爲常以是義故名曰無常復次善男子諸行無我總一切法謂色非色色非我者可破可壞我者不爾以是義故知色非我非色之法亦復非我何以故因緣生故若諸外道以專念故知有我者專念之性實非我也若以專念爲我性者過去之事則有忘夫有忘失故定知無我若諸外道以憶想故知有我者無憶想故定知無我若諸外道以有遮故知有我者善男子以有遮故定知無我如言調達終不發言非調達也我亦如是

若定是我終不遮我以遮我故定知無我若以遮故知有我者汝今不遮定應無我復次善男子若諸外道以相貌故知有我者善男子相故無我無相故亦無我若人睡時不能進止俯仰視胸不覺苦樂不應有我若以

轉

十三

進止俯仰視胸知有我者機關木人亦應有我善男子如來亦爾不進不止不俯不仰不視不胸不苦不樂不貪不恚不癡不行如來如是真實有我善男子是諸外道癡如小兒無慧方便不能了達常與無常苦樂淨不淨我無我壽命非壽命衆生非衆生實非實有非有於佛法中取少許分虛妄計有常樂我淨而實不知常樂我淨如生盲人不知乳色便問他言乳色何似以是義故我佛法中有真實諦非諸外道文殊師利白佛言希有世

尊如來於今臨般涅槃方便轉於無上法輪乃作如是分別真諦佛告文殊師利汝今云何故於如來生涅槃想善男子如來實是常住不變不般涅槃善男子若有計我是佛我成阿耨多羅三藐三菩提我即是法法是我所我即是道道是我所我即世尊世尊即是我所我即是聲聞聲聞即是我所我能說法令他聽受我轉法輪餘人不能如來終不作如是計是故如來不轉法輪善男子若言常住無有變易云何說言佛轉法輪是故汝今不應說言如來方便轉於法輪譬如因眼緣色緣明緣思惟因緣和合得生眼識眼不念言我能生識色乃至思惟終不念言我生眼識眼識亦復不作念言我能自生善男子如是等法因緣和合得名爲見如來亦爾因六

波羅密三十七助菩提之法覺了諸法復因
咽喉舌齒唇口言語音聲爲橋陳如初始說
法名轉法輪以昇義故如來不名轉法輪也
譬如因鼓因空因桴和合出聲鼓不念言我
能出聲乃至桴亦如是聲亦不言我能自生

機五

十四

如來亦爾終不念言我轉法輪轉法輪者名
爲不作不作者即轉法輪轉法輪者即是如
來善男子轉法輪者乃是諸佛世尊境界非
諸聲聞緣覺所知善男子虛空非生非出非
作非造非有爲法如來亦爾非生非出非作
非造非有爲法如來性佛性亦爾非生非
出非作非造非有爲法諸佛世尊語有二種
一者世語二出世語如來爲諸聲聞緣覺說
於世語爲諸菩薩說出世語善男子是諸大
衆復有二種一者求小乘二者求大乘我於

昔日波羅奈城爲諸聲聞轉於法輪今始於
此拘施那城爲諸菩薩轉大法輪復次善男
子我昔於彼波羅奈城初轉法輪八萬天人
得須陀洹果今於此間拘施那城八十萬億
人不退轉於阿耨多羅三藐三菩提復次善

男子波羅奈城大梵天王稽首請我轉於法
輪今於此間拘施那城迦葉菩薩稽首請我
轉大法輪復次善男子我昔於彼波羅奈城
轉法輪時說於無常苦空無我今於此間拘
施那城轉法輪時說常樂我淨復次善男子

機五

十五

我昔於彼波羅奈城轉法輪時所出音聲聞
於梵天如來今於拘施那城轉法輪時所出
音聲徧於東方二十恒河沙等諸佛世界南
西北方四維上下亦復如是善男子諸佛世
尊凡有所說皆悉名爲轉法輪也譬如聖王

所有輪寶未降伏者能令降伏已降伏者能令安隱諸佛世尊凡所說法亦復如是無量煩惱未調伏者能令調伏已調伏者令生善根譬如聖王所有輪寶則能消滅一切怨賊如來演法亦復如是能令一切諸煩惱賊皆悉寂靜 爾時世尊告迦葉菩薩善男子是名菩薩住於大乘大涅槃經所行聖行是諸世尊安住於此大般涅槃而作如是開示分別演說其義以是義故名曰聖行聲聞緣覺及諸菩薩如是聞已則能奉行故名聖行善男子是菩薩摩訶薩得是行已則得住於無所畏地若有菩薩得住如是無所畏地則不復畏貪恚愚癡生老病死亦復不畏惡道地獄畜生餓鬼善男子惡有二種一者阿修羅二者人中中有三種惡一者一闍提二者

誹謗方等經典三者犯四重禁住是地中諸菩薩等終不畏墮如是惡中亦復不畏沙門婆羅門外道邪見天魔波旬亦復不畏受二十五有是故此地名無所畏菩薩摩訶薩住無畏地得二十五三昧壞二十五有善男子得無垢三昧能壞地獄有得無退三昧能壞畜生有得心樂三昧能壞餓鬼有得歡喜三昧能壞阿修羅有得日光三昧能斷弗婆提有得月光三昧能斷瞿耶尼有得熱燄三昧能斷薺單越有得如幻三昧能斷閻浮提有得一切法不動三昧能斷四天王處有得摧伏三昧能斷三十三天處有得悅意三昧能斷燄摩天有得青色三昧能斷兜率天有得黃色三昧能斷化樂天有得赤色三昧能斷他化自在天有得白色三昧能斷初禪有得

機五

十六

種種三昧能斷大梵王有得雙三昧能斷二
禪有得雷音三昧能斷三禪有得霆雨三昧
能斷四禪有得如虛空三昧能斷無想有得
照鏡三昧能斷淨居阿那含有得無礙三昧
能斷空處有得常三昧能斷識處有得樂三
昧能斷不用處有得我三昧能斷非想非非
想處有善男子是名菩薩得二十五三昧斷
二十五有如是二十五三昧名諸三昧王諸
菩薩摩訶薩入如是等諸三昧王若欲吹壞
須彌山王隨意即能欲知三千大千世界所
有衆生心之所念亦悉能知欲以三千大千
世界所有衆生內於己身一毛孔中隨意即
能亦令衆生無迫近想若欲化作無量衆生
悉令充滿三千大千世界中者亦能隨意欲
分一身以爲多身復合多身以爲一身雖作

機五

十七

如是心無所著猶如蓮華善男子菩薩摩訶
薩得入如是三昧王已即得住於自在之地
菩薩得住是自在力隨欲生處即
得往生譬如聖王領四天下隨意所行無能
障礙菩薩摩訶薩亦復如是一切生處若欲
生者隨意往生善男子菩薩摩訶薩之所成
就如是功德無量無邊百千萬億尚不可說
何況諸佛所有功德而當可說 迦葉菩薩
白佛言世尊如佛所讚大涅槃經猶如醍醐
最上最妙若有能服衆病悉除一切諸藥悉
入其中我聞是已竊復思念若有不能聽受
是經當知是人爲大愚癡世尊我於今者實
能堪忍剝皮爲紙刺血爲墨以髓爲水析骨
爲筆書寫如是大涅槃經書已讀誦令其通
利然後爲人廣說其義爾時佛讚迦葉菩薩

善哉善哉善男子汝今以此善心因緣當得超越無量無邊恒河沙等諸大菩薩在前得成阿耨多羅三藐三菩提汝亦不久復當如我廣爲大眾演說如是大般涅槃如來佛性諸佛所說祕密之藏善男子過去之世佛日

未出我於爾時作婆羅門修菩薩行悉能通達一切外道所有經論修寂滅行具足威儀其心清淨不爲外來能生欲想之所破壞滅瞋恚火受持常樂我淨之法周徧求索大乘經典乃至不聞方等名字我於爾時住於雪山其山清淨流泉浴池樹林藥木充滿其地處處石間有清流水多諸香華周徧嚴飾衆鳥禽獸不可稱計甘果滋繁種別難計復有無量藕根甘根青木香根我於爾時獨處其中唯食諸果食已繫心思惟坐禪經無量歲

善男子我修如是難行苦行時釋提桓因及諸天人等心大驚怪即共集會各各相謂而說偈言

各各相指示 清淨雪山中 寂靜離欲主
功德莊嚴王 已離貪瞋慢 永斷諸愚癡

口初未曾說 麤惡等語言

爾時衆中有一天子名曰歡喜復說偈言

如是離欲人 清淨勤精進 將不求帝釋

及以諸天耶 若是外道者 修行諸苦行

是人多欲求 帝釋所生處

釋五

文

爾時復有一仙天子即爲帝釋言僑師迦世有大士爲衆生故不貪已身亦不願求生於天上唯求欲令一切衆生得受快樂如我所解如是大士清淨無染衆結永盡唯欲求於阿耨多羅三藐三菩提釋提桓因復作是言

如汝言者是人則爲攝取一切世間衆生大

仙若此世間有佛樹者我等悉當得滅無量

熾然煩惱如是之事實爲難信何以故無量

百千諸衆生等發於阿耨多羅三藐三菩提

心見少微緣於阿耨多羅三藐三菩提即便

續五

十九

動轉如水中月水動則動猶如畫像難成易

壞菩提之心亦復如是難發易壞是故我今

雖見世人修於苦行無惱無熱住於道檢其

行清淨未能信也我今要當自往試之大仙

猶如車有二輪則有載用鳥有二翼堪任飛

行是苦行者亦復如是我雖見其堅持禁戒

未知其人有深智不若有深智當知則能堪

任荷負阿耨多羅三藐三菩提之重擔也大

仙如菴羅樹華多果少衆生發心乃有無量

及其成就少不足言爾時釋提桓因自變其

身作羅刹像形甚可畏下至雪山宣過去佛

所說半偈

諸行無常 是生滅法

是苦行者聞是半偈心生歡喜譬如估客於

險難處失伴遇同侶亦如久病遇良醫妙藥

如人沒海卒遇船舫如渴乏人遇清冷水亦

如農夫炎旱值雨亦如行人還得歸家善男

子我於爾時聞是半偈心中歡喜亦復如是

即從座起以手舉髮四向顧視而說是言向

所聞偈誰之所說誰開如是解脫之門誰能

雷震諸佛音聲誰於生死睡眠之中而獨覺

寤唱如是言誰能於此示導生死飢饉衆生

無上道味無量衆生沉生死海誰能於中作

大船師是諸衆生常爲煩惱重病所纏誰能

於中爲作良醫說是半偈啓悟我心猶如半

月漸開蓮華善男子我於爾時更無所見唯見羅刹復作是念而此羅刹或能得見過去諸佛從諸佛所聞是半偈我今當問即便前至羅刹所言善哉大士汝於何處得是過去離怖畏者所說半偈復於何處而得如是半

機五

二十

如意珠善男子我問是已即答我言大婆羅門汝今不應問我是義何以故我不食來已經多日處處求索了不能得飢渴苦惱心亂寢語非我本心之所知也我即問言汝所食者爲是何物羅刹答言我所食者唯人煖肉其所飲者唯人熱血自我薄福唯食此食周徧求索困不能得善男子我復語言汝但具足說是半偈我聞偈已當以此身奉施供養大士我設命終如此之身無所復用我今爲求阿耨多羅三藐三菩提捨不堅身以易堅

身羅刹答言誰當信汝如是之言爲八字故棄所愛身善男子我即答言汝真無智譬如有人施他瓦器得七寶器我亦如是捨不堅身得金剛身汝言誰當信者我今有證大梵天王釋提桓因及四天主能證是事復有天眼諸菩薩等爲欲利益無量衆生修行大乘具六度者亦能證知復有十方諸佛世尊利衆生者亦能證我爲八字故捨於身命羅刹復言汝若如是能捨身者諦聽諦聽當爲汝說其餘半偈善男子我於爾時聞是事已心中歡喜即解已身所著鹿皮爲此羅刹敷置法座白言和尚願坐此座我即於前叉手長跪而作是言唯願和尚善爲我說其餘半偈令得具足羅刹即說

機五

三十一

生滅滅已 寂滅爲樂

爾時羅刹說是偈已復作是言菩薩摩訶薩
汝今已聞具足偈義汝之所願爲悉滿足若
必欲利諸衆生者時施我身善男子我於爾
時深思此義然後處處若石若壁若樹若道
書寫此偈即便更繫所著衣裳恐其死後身
體露現即上高樹爾時樹神復問我言善哉
仁者欲作何事善男子我時答言我欲捨身
以報偈價樹神問言如是偈者何所利益我
時答言如是偈句乃是過去未來現在諸佛
所說開空法道我爲此法棄捨身命不爲利
養名聞財寶轉輪聖王四大天王釋提桓因
大梵天王人天中樂爲欲利益一切衆生故
捨此身善男子我捨身時復作是言願令一
切慳惜之人悉來見我捨離此身若有少施
起貢高者亦令得見我爲一偈捨此身今如

棄草木菩薩爾時說是語已尋即放身自投
樹下未至地時虛空之中出種種聲其聲乃
至阿迦尼吒天爾時羅刹還復釋身即於空
中接取菩薩安置平地爾時釋提桓因及諸
天人大梵天王稽首頂禮菩薩足下讚言善
哉善哉真是菩薩能大利益無量衆生欲於
無明黑暗之中然大法炬由我愛惜如來大
法故相憐憫唯願聽我懺悔罪咎汝於未來
必定成就阿耨多羅三藐三菩提願見濟度
爾時釋提桓因及諸天衆禮菩薩足於是辭
去忽然不現善男子如我往昔爲半偈故捨
棄此身以是因緣使得超越足十二劫在彌
勒前成阿耨多羅三藐三菩提善男子我得
如是無量功德皆由供養如來正法汝今亦
爾發於阿耨多羅三藐三菩提心則已超過

機五

三三

無量無邊恒河沙等諸菩薩上善男子是名
菩薩住於大乘大般涅槃修於聖行

善男子云何菩薩摩訶薩梵行善男子菩薩
摩訶薩住於大乘大般涅槃住七善法得具
梵行何等爲七一者知法二者知義三者知
時四者知足五者知自六者知衆七者知尊
卑善男子云何知法菩薩摩訶薩知十二部
經能作論義分別廣說是名知法善男子云
何知義菩薩摩訶薩若於一切文字語言廣
知其義是名知義云何知時菩薩善知如是
時中任修寂靜如是時中任修精進如是時
中任修捨定如是時中任供養佛如是時中
任供養師如是時中任修布施持戒忍辱精
進禪定具足般若波羅密是名知時云何知
足菩薩摩訶薩知足者所謂飲食衣藥行住

卷五

二十三

坐卧睡寤語默是名知足云何自知是菩薩
自知我有如是信如是戒如是多聞如是捨
如是慧如是去來如是正念如是善行如是
問如是答是名自知云何知衆是菩薩知如
是等是刹利衆婆羅門衆居士衆沙門衆應
於是衆如是行來如是坐起如是說法如是
問答是名知衆云何知人尊卑人有二種一
者信二者不信菩薩當知信者是善其不信
者不名爲善善男子是名菩薩摩訶薩住於
大乘大般涅槃經住七善法菩薩住是七善法
已得具梵行復次善男子復有梵行謂慈悲
喜捨夫修慈者能斷貪欲修悲心者能斷瞋
恚修喜心者能斷不樂修捨心者能斷貪欲
瞋恚善男子四無量心成就甚難何以故久
於過去無量劫中多習煩惱未修善法是故

不能於一日中調伏其心又如家犬不畏於人山林野鹿見人怖走瞋恚難去如守家狗慈心易失如彼野鹿是故此心難可調伏初住菩薩修大慈時於一闡提心無差別不見其過故不生瞋以是義故得名大慈善男子爲諸衆生除無利益是名大慈欲與衆生無量利樂是名大悲於諸衆生心生歡喜是名大喜無所擁護名爲大捨若不見我法相已身見一切法平等無二是名大捨自捨已樂施與他人是名大捨善男子唯四無量能令菩薩增長具足六波羅蜜其餘諸行不必能爾菩薩摩訶薩先得世間四無量心然後乃發阿耨多羅三藐三菩提心次第方得出世間者善男子因世無量得出世無量以是義故名大無量迦葉菩薩白佛言世尊除無

機五

二十四

利益與利樂者實無所爲如是思惟即是虛觀無有實利善男子夫修慈者實非妄想諦是真實若是聲聞緣覺之慈是名虛妄諸佛菩薩真實不虛云何知耶善男子菩薩摩訶薩修行如是大涅槃者觀土爲金觀金爲土地作水相水作地相水作火相火作水相地作風相風作地相隨成就無有虛妄觀實衆生爲非衆生觀非衆生爲實衆生悉隨意成無有虛妄善男子當知菩薩四無量心是實思惟非不真實善男子能爲善者名實思惟實思惟者即名爲慈慈即如來慈即大乘大乘即慈慈即如來善男子慈即菩提道菩提道即如來如來即慈善男子慈即大梵大梵即慈慈即如來善男子慈者即是衆生佛性如是佛性久爲煩惱之所覆蔽故令

衆生不得覩見佛性即慈慈即如來善男子
慈即大空大空即慈慈即是常常即是法法
即是僧僧即是慈慈即如來善男子菩薩摩
訶薩住於大乘大般涅槃修如是慈雖復安
住眠睡之中而不睡眠勤精進故雖常覺寤

根五

二十五

亦無覺寤以無眠故於睡眠中諸天雖護亦
無護者不行惡故眠不惡夢無有不善離睡
眠故命終之後雖生梵天亦無所生得自在
故善男子夫修慈者能得成就如是無量無
邊功德我說是慈有無量門所謂神通善男
子如提婆達教阿闍世欲害如來阿闍世王
即放護財狂醉之象欲令害我及諸弟子爾
時王舍大城之中一切人民同時舉聲啼哭
號泣作如是言怪哉如來今日滅沒如何正
覺一旦散壞善男子我於爾時爲欲降伏護

財象故即入慈定舒手示之即於五指出五
師子是象見已其心怖畏舉身投地敬禮我
足善男子我於爾時手五指頭實無師子乃
是修慈善根力故令彼調伏 復次善男子
此南天竺有一大城名首波羅於是城中有
一長者名曰盧至我時欲度彼長者故從王
舍城至彼城邑彼衆尼犍聞我欲至首波羅
城即作是念沙門瞿曇若至此者此諸人民
便捨我等更不供給諸尼犍輩各各分散告
彼城人沙門瞿曇今欲來此於此人民大不
利益彼人聞已即懷怖畏白言大師我等今
者當作何計尼犍答言沙門瞿曇性好叢林
流泉清水汝等便可相與出城諸有之處砍
伐令盡莫使有遺流泉井池悉置糞穢堅閉
城門各嚴器仗我等亦當作種種術令彼瞿

曇復道還去彼諸人民一一施行善男子我
於爾時至彼城邑見是事已尋生憐愍慈心
向之所有樹木還生如本河池井泉清淨盈
滿變其城壁爲紺瑠璃門自開闢無能制者
所嚴器仗變成雜華盧至長者而爲上首與
其人民俱共相隨往至佛所我即爲說種種
法要令彼諸人一切皆發阿耨多羅三藐三
菩提心善男子我於爾時實不化作種種樹
木清淨流水盈滿河池變其本城爲紺瑠璃
開其城門器仗爲華善男子當知皆是慈善
根力能令彼人見如是事 復次善男子瑠
璃太子以愚癡故多害釋種則劓耳鼻斷截
手足推之坑塹彼時諸人身受苦惱作如是
言南無佛陀南無佛陀我於爾時在竹林中
聞其音聲即起慈心諸人爾時見我來至迦

雙五

三六

毘羅城以水洗瘡以藥敷之苦痛尋除耳鼻
手足還復如本我時即爲略說法要悉令俱
發阿耨多羅三藐三菩提心善男子如來爾
時實不往至迦毘羅城以水洗瘡敷藥止苦
當知皆是慈善根力令彼諸人見如是事悲
喜之心亦復如是善男子以是義故菩薩摩
訶薩修慈思惟即是真實非虛妄也夫無量
者不可思議菩薩所行不可思議復次善男
子菩薩摩訶薩修慈悲喜已得住極愛一子
之地云何是地名曰極愛復名一子善男子
譬如父母見子安隱心大歡喜菩薩摩訶薩
住是地中視諸衆生同於一子見修善者生
大歡喜是故此地名曰極愛
御錄經海一滴卷之十五

音釋

撓 初銜切 垢格切 嵐 盧含切 則 而至切
耳 插入聲 垢 音策 音藍 則 音二歲
也 劓 以智切 音 也 鼻 也